

Zeitschrift: Annalas da la Societad Retorumantscha
Herausgeber: Societad Retorumantscha
Band: 135 (2022)

Nachruf: Jürg Parli 1938-2021
Autor: Klainguti, Göri

Nutzungsbedingungen

Die ETH-Bibliothek ist die Anbieterin der digitalisierten Zeitschriften auf E-Periodica. Sie besitzt keine Urheberrechte an den Zeitschriften und ist nicht verantwortlich für deren Inhalte. Die Rechte liegen in der Regel bei den Herausgebern beziehungsweise den externen Rechteinhabern. Das Veröffentlichen von Bildern in Print- und Online-Publikationen sowie auf Social Media-Kanälen oder Webseiten ist nur mit vorheriger Genehmigung der Rechteinhaber erlaubt. [Mehr erfahren](#)

Conditions d'utilisation

L'ETH Library est le fournisseur des revues numérisées. Elle ne détient aucun droit d'auteur sur les revues et n'est pas responsable de leur contenu. En règle générale, les droits sont détenus par les éditeurs ou les détenteurs de droits externes. La reproduction d'images dans des publications imprimées ou en ligne ainsi que sur des canaux de médias sociaux ou des sites web n'est autorisée qu'avec l'accord préalable des détenteurs des droits. [En savoir plus](#)


Terms of use

The ETH Library is the provider of the digitised journals. It does not own any copyrights to the journals and is not responsible for their content. The rights usually lie with the publishers or the external rights holders. Publishing images in print and online publications, as well as on social media channels or websites, is only permitted with the prior consent of the rights holders. [Find out more](#)

Download PDF: 18.07.2025

ETH-Bibliothek Zürich, E-Periodica, <https://www.e-periodica.ch>

Jürg Parli
1938–2021



Jürg Parli es creschieu sü a San Murezzan, inua cha sieu bap eira magister secundar. La mamma scu eir il bap eiran oriunds da la Val Müstair – a chesa gniva dimena discurrieu jauer.

Zieva las scoulas a San Murezzan ho Jürg frequento il gimnasi da Cuira per ir alura a Basilea, inua ch'el ho fat la scoula d'art. Lo s'ho'l acquisto il diplom da magister da disegn. El es gnieu clamo a Soletta (Solothurn) scu magister da disegn al gimnasi. Pü tard, cur cha'd es gnieu fundo il seminari, ho'l surpiglio lo l'incumbenza da magister da disegn, que ch'el ho fat fin a sia pensiun. Soletta es dvanto sieu dachesa. Cò al cugnuschaiva ed appredschiva tuot la cited. El giaiva in gir cun sieu velo e chapè ed eira dvanto ün dals originels da la cited!

Jürg Parli ho fat bgeras exposiziuns da purtrets – el ho fat stupends purtrets da cited, vistas tuot specielas aint per giassas e da detagls a Soletta, ma eir da Bergamo, da Rapallo u da Como. Eir exposiziuns cun purtrets abstracts haun adüna darcho gieu grand success. El ho decoro paraids e perfin la granda fatscheda d'ün chesamaint in vicinanza da la staziun da Soletta. Quel affras-ch vaiva fat fer la firma Stuag. Ma cur cha la firma es gnida vendida, haun ils nouvs patrunz, Implenia, fat der giò alv la fatscheda – que chi nun ho bricha plaschieu a la glieud da Soletta. Il president da cited ho fat e fat, fin cha la nouva firma ho do l'incumbenza a Jürg Parli da refer il grand affras-ch, que ch'el, intaunt ill'eted da 74 ans, ho fat infra nouv dis!

Fich important per Jürg Parli es adüna sto eir il carnaval. Püs ans ho'l pudieu disegner la placketta. E per l'an 2023 gnaro culo la «Chessler Glocke» cha Jüpa vaiva creo.

Eir scha Jürg Parli as sentiva bain a Soletta e sieus contuorns – ster staiva el cun Liliana, sia duonna, illa vschinauncha da Riedholz – es el adüna resto collio ferm cun la Val Müstair e cun l'Engiadina. Taunt il rumauntsch, scu eir la natüra al staivan fich a cour. Liliana ho dafatta imprains jauer; que es propi il jauer chi d'eira la lingua da Jüpa! Ma el savaiva eir perfettamaing puter e vallader.

Que s'ho do cha Jürg ho cumanzo a fer disegns pel *Chardun*. La redacziun pudaiva be manzuner ün tema u l'oter, schi il di zieva d'eiran già rivos cun la posta ils disegns giavüschos.

Jürg Parli ho eir illustro innumbrablas publicaziuns rumauntschas. Saja cudaschets da poesias, d'istorgia u dad istorgias. Sieus disegns accumpagnaivan mincha text cun ün liger surrir. Eir illa *Posta Ladina / Engadiner Post* sun cumparieus da sieus disegns. Bgers disegns haun criticho in möd fich tagliaint situaziuns e circunstanças e decisiuns politicas. Ma Jürg Parli savaiva dir las chosas cun ün umur uschè bainvugliaint cha eir il criticho nu pudaiva piglier in mela part la critica.

Disegner disegnaiva'l adüna! Scha s'eira in cumpagnia cun el, vaiva'l adüna il rispli in maun e sün maisa ün plic da pitschnas cartinas, pel solit i'l format dal tagl d'or. Scu cha que vo in cumpagnia: minchün discuorra e do da las sias, chi cun grand'importanza, chi fo, modestin, be cò e lo üna remarcha. E düraunt tuot la conversaziun faiva il rispli da Jüpa sias stüertinas e strichs chi resümaivan in möd pizzicato las vardets e'ls spropositis güsta be quintos.


A militer stu'l avair invento la figürina cul nesun e sainza culöz ch'el numnaiva Jüpa. Quella al faiva, scu ch'el ho dit adüna darcho, buna cumpagnia. Ella as pudaiva transmüder in ün pulizist u in üna duonna, in ün murdieu u insomma in qualunque rolla umauna u perfin inumauna.

I'l *Chalender Ladin* dal 2014 ho Jürg Parli descrit in jauer ed illustro cun bgers disegnins il cuors da sia vita. Lo ho'l explichò cha disegner e pudair fer rir a la glieud saja que chi al fatscha il pü grand plaschair.


I'ls ultims ans ho Jürg discus cun sia duonna che chi füss da fer, cur ch'el moura. Ün funarel? Na, quello nu'l paraiva la güsta. El vaiva fat tauntas vernissaschas. Perche na üna finissascha? Dimena ho'l cumanzo a fer, cur cha'l gnivan idejas, disegns sur da la mort. El ho giavüschò cha vegna fat üna finissascha in sia memoria a las 11.11 illa Couronne a Soletta. – l'ündesch es la cifra da carnaval.



la situazion «vin-vin»



ün tipic engiadinalis




Il bagn cuviert
da San Murezzan




La fin d'october dal 2021 ho Jürg Parli clappo ota feivra ed ho stuvieu gnir purto a l'ospidel. Lo haune diagnosticho üna leukemia incurabla. El es turno a chesa ed als 9 november ho'l pudieu murir.

Als 28 november s'haun radunedas bgeras amias ed amihs da Jürg illa Couronne. Üna pianista ho suno ed amihs haun tgnieu cuorts discuors. Alura es gnida avierta la finissascha: 99 ($9 \times 11!$) disegns eiran pendieus tenor il giavüsch da Jürg scu altschiva vi d'üna lungia corda intuorn ed intuorn il distint local. E la glieud s'ho spusteda in lingia pass per pass, da disegn a disegn. Cun ün fin risulin u perfin minchataunt cun üna risatta ho minchün pudieu piglier cumgio da quist cher fido umaun be spiert e stincals.

Göri Klainguti, Samedan, gklainguti@bluewin.ch



In vino veritas – o bella
scha be da stuorn s'vegn our cum ella.
(Artur Caflisch)



Buna not, dorma bain!
(a buots il sön fa bain)
(der Schlaf tut allen gut)



Il temp es co:
El pigl'e vo.
«Es ist Zeit: Er nimmt's und geht.»
(Artur Caflisch: die Uhr)



Gott sei Dank!
nun ist's vorbei
mit der blöden Zeichnerei!

